

襄垣縣志

重修襄垣縣志序

余蒞襄垣之次年奉大府頒到山西各縣志書凡例爲圖爲略爲傳爲表爲考計五種圖之屬有四略之屬有十傳之屬有六表之屬有三考之屬有七各門皆列子目爲大學校教務長郭君象升所訂自得此例而後修志有所据依矣余檢舊志目錄與新定凡例校閱名目不同而事實則一其間去取詳略有差耳郭君之爲此例於方志學大有研究自史漢書志以及三通之籍確能心知其意而後頒爲成式俾修志之人不迷於所向郭君可謂通雅者已考舊志襄邑爲趙襄子所作故名襄垣其地爲銅鞮舊壤晉君於此作虓祁之宮山川之美概可知矣而其人如羊舌赤豫讓留侯諸君子又皆震古鑠今爲他邑之無生斯土者宜知所效法卽巍然人上而爲官者幸何如之雖襄邑科第前清不及有明之盛而自變革以來讀書者漸啟新知其思想發達有一日千里之勢故赴并赴潞以及東西洋遊歷求學者於上黨稱首出焉民國旣建參議院有人衆議院更有人似選舉時代人材較勝於科舉亦運會然使耳迺者督軍閻公於南北紛爭時獨講求吏治關心民瘼要政以次舉行而猶注意方志之書凡例引云志書主於博稽陳迹以前民用是舉一事必求一事之有益爲治非博愛民之譽而修志不矜雅故之奇卽志書與治術相爲表裏也用琛臨蒞茲土媿無成績可述然觀舊志刷印之劣新例命名之當幾有怍怍欲動者徒以秉筆之人材旣呈身於公務而按畝籌欸又恐貽累小民滋爲口實是以因循不果茲將

舊志門類可合於新例者分編纂組其新例有而舊志無者暫付闕如以俟作者編輯旣成復準新例每類作緣起數語蓋以說明新舊分合詳略增省之故也新志旣待採輯爰就編定之本寫成一部都九卷與郭君之新凡例并存俾襄人之重修志者依例接續開卷了然此用琛治襄二年以來之志也舊志載盧文昭序未必親至襄垣躬與編輯之事然盧先生校讎精審當能有益於斯志者又有宋公如辰序公爲吾鄉先達供職詞林雖文字未入韓歐之室固用琛所樂步其後塵者也用琛生異代之後勉爲志叙得綴名二公之末與有榮焉

民國八年十一月襄垣縣知事黃崗巖用琛叙

重修襄垣縣志序

志非史也特以供史館之搜集備史家之採擇而已蓋史之義主於褒貶以爲教也志則詳於因革以爲治也故曰志非史也襄垣縣志前散軼無徵自明嘉靖年間任邱趙修菴公創修之繼之者張令古河王令立宣迄河內蕭公湛泉始克蕝事乾隆四十有七年李鶴亭明府重修之光緒六年程令功銓復葺之至民國七年 兼省長閻公頒布改編縣志新例嚴令南翹已就舊志如其新例分門摘錄甫著手搜輯無何卸篆乃將原本交李令果成值歲早籌備救荒未及舉辦適余於壬戌仲夏承乏斯邑察覽縣志得其原本摘錄周詳惟四十年間之疆域之風俗之政教及其戶口增減賦稅重輕與夫天時地利人事之變遷諸待考詢採輯皆以俟之來者余材雖不濟良以縣志爲吏治之本前事乃後事之師也襄邑雖無名山大川考其陳跡爲銅鞮之故里趙襄子之遺址也觀茲土俗醇良士民勤儉猶不失陶唐之遺風其足以激勸於將來者正復不少爲司牧者詎聽湮沒耶於是聘邑中耆賢博爲採訪網羅軼事摭拾新聞擷其菁英芟其蕪濫不數月編纂告成邑人士捐省銀行及抵產局之贏利飲助之事竣付刊請序於余爰勉作數語藉示來葉而亦以自策焉

民國十二年癸亥孟夏簡任職署襄垣縣知事楚北荆門魯宗藩識

重修襄垣縣志序

丹階魯公蒞襄之次年治具畢張政平訟理以其暇監修邑志既屬橋介襄紳屬爲參閱余忘其讞陋有所商榷謬蒙采擇並徵序言竊維縣志之修在他時尚可緩圖在今日實爲急務何者改革以來一切政治如學校警察賦稅諸大事靡不舍其舊而新是圖當此新陳遞嬗之交非及時紀述不惟新者無以資率由而舊者亦將漸歸於湮沒後有作者幾何不致歎於文獻之無徵哉又况近歲以來我晉

兼省長閻公注意民治勵行村政一切設施次第演進而整理村範尤爲晉省政治之特色不詳爲紀載將何以信今而傳後耶前任嚴公有見於此故奉檄以來即參攷舊志依例編輯今魯公亦見及此故遴選紳耆採訪續纂哀然成帙燦然大備古人所謂爲之先爲之後聚精會神相得益彰者其此之謂歟余往歲主講漳川書院樂與都人士以文學相切磋與襄人交誼甚洽故於襄事亦遂若欣戚之相關幸是志之成而喜襄之能急於先務也因爲之序

民國十三年二月上澣武鄉李華炳樸齋氏謹題

重修襄垣縣志序

古者志與史無區別考周禮有太史內史掌六典八枋而小史外史掌邦國志四方志不過藉其名以明權限之大小責任之輕重後人於國家之政治法律軍事財政輯之成書即名曰史於國家之山河物產人情風俗輯之成書即名曰志蓋權輿於周禮而史與志之體裁始分其途然立法當時垂教後世彰瘴懲勸之精神仍未異於古也夫縣志者不僅如載山河物產人情風俗之書而政治法律軍事財政舉包括無遺雖謂之志亦史之意也且今之縣治地方百里可以方於古之諸侯蓋晉之乘楚之擣机魯之春秋皆諸侯史也縣之紀載詎可一日缺而志之脩不可一日緩也襄垣縣志古有成書代遠年湮散佚兵火之餘殘缺無存早爲有識者所浩歎今之舊志創於任邱趙修菴公官經六任時閱十世而始成書其艱難困苦概可知已而宋元以上仍多缺略年久失修深堪危懼自清光緒六年程公功銓續修後迄今又四十餘載中經改革百度變更新陳代替之關尤宜詳載故實以昭來茲歲己未縣長嚴公南翹奉天府所頒各縣志書凡例力圖重脩因艱於款僅依新例將舊志摘錄九冊而待查之事迹新添之門類暫付闕如旋去任荆門魯公丹階於壬戌之夏來宰斯邑初蒞任即圖此舉集闔邑士紳籌議進行余因奔走國事初未與聞是年秋丁艱返籍守禮魯公屬余勸襄其事屢辭不獲勉從諸紳之後嚴公之摘錄諸本事實有與新例不合者歸正之緣起有與事實欠洽者更易之非敢故爲立異公同討論務求妥協期

欲見信於後世也其所闕諸門待補諸事旁搜博採分類接續書成共訂八本事實既與前稿有出入而本數亦不必拘於舊也此次纂脩連君篤敬孫君安樂趙君懷璧郝君映衡郭君永慶趙君允元多任其勞余本不文又兼身弱時僅五月臥病六旬益以俗務纏繞住局之日無多忝列纂脩深滋愧赧惟隨在事諸君謹慎將事俾盡乃心共體魯公求治之心以竟嚴公不朽之業繕成信史激勵來者差堪告無罪於襄人也已

中華民國十二年五月希文王維新序

重修襄垣縣志序

壬戌夏荆門魯公來宰是邦下車之始集士紳於庭出前任南翹公手輯襄志九卷以示衆曰此嚴公未竟之志也願續成之以竟其功印刷費余將籌之蓋嚴志卽余志當亦諸君子樂成之志耶適李君汾圃由京來函亦贊成斯舉余等遂決然曰縣志失修已四十年於茲矣此四十餘年之事蹟爲因爲創若繁若簡賦役也兵防也禮俗也生業也又學校官師選舉各要政自民國革新迥異前制不及時而紀載之則此邦之掌故缺如必遺憾於後之執筆者矧嚴公已開其先魯公又欲成於後後先繼美以心印心余等據實直書分訂成冊此其機矣義務所在何敢却辭卽於是年十二月開辦依例編製調查者參閱者繪畫者繕寫者分門別類謹慎從事自開辦至脫稿日五閱月而成雖魚魯豕亥在所難免然舊志之宜存在與新志之應採入者俱依郭君所定凡例圖略傳表考五種三十目觸類列之惟每類志緣起一段多嚴公手定餘則光宣以後及民國十二年止凡學校之設施選舉之改定區村制之計劃與名宦文儒孝義士女之可傳可記者有聞必錄無據不詳遺者補之缺者增之合舊志新志爲一部寫成八卷不尙流連風景之辭存實錄也稿成日以就正於魯公公曰言約事賅斯志一成庶有以答嚴公矣抑亦余宰襄之初志也因囑希文君携稿入都與同志詳加參閱即付剞劂以備採覽大雅君子其幸教焉

民國十二年五月德輿連篤敬謹序

襄垣縣重修縣志序

中華民國十三年九月余承乏斯邦蒞任伊始所最注意而考察者山川形勢也風土人情也沿革掌故也政治教育交通及實業農桑也任事之次月冀寧道道尹孫公葑癡函交縣志稿本一部屬轉知修志局同仁再為校正公暇翻閱一過見其籤注頗詳時修志局業經停辦諸同仁均家居而農忙焉明年二月詢政會討論修理城垣事議決之適修志局同仁亦與會遂轉知並交稿本請復校諸同仁僉云城垣將修葺工程重要必須記述且修志以來機關屢有變遷城郭圖亦當更正請少緩十四年三月奉令組織城防保衛團城工局亦於五月間設立籌款招包開工矣秋冬之交遼役緊張城內西營廐亭各處差務繁夥徵糧草備車驟輸送甚忙十五年一月奉築汽路及設民軍營之命委員先後到縣開會籌款日無暇晷二月陸軍四十一團奉令駐防城垣上四周作掩蔽部挖交通壕月餘出武安而路工處民軍營遂次第開辦十六年城工汽路及汽路六尺以下之涵洞工程告竣又因差務之需要決議設軍電局以通消息聯合校長事務所及保藏公物所亦皆相繼成立十七年二月全縣支差改用公車由各村分等籌備廐亭辦差員請修舊驛站馬號為辦差處復通過全縣紳士會議決由差款項下支發修理費委公欸局局員同第二區行政長出標招包派員監修今工已完竣矣然則千百年未遇之城工路工及交通最便之軍電局或按閭出工或因地籌款於地方人民關係重大均有記載之必要三月議復修志局分路調查編纂校對至十月事畢同仁諸君持稿本囑閱並序余不文以為八年迄今春秋已十度矣修志一舉創於嚴而繼於魯嚴魯兩縣長暨參閱纂修諸公分序均為詳盡似不必再贅叙言惟近數年來國家多事戎馬倉皇陘出師克摧強敵山河統一政治刷新滄海桑田頻行改革此校正所以遲緩付梓所以闕如迴憶諸同仁當日延緩之深意實與此志有永垂不朽之同功故不可不特為述及也已是為序

中華民國十七年十月三等嘉禾章簡任職襄垣縣縣長趙城許喆誌

襄垣縣重修志書姓氏

總修

署理襄垣縣知事

嚴用琛

署理襄垣縣知事

魯宗藩

監修

署理襄垣縣知事

許喆

總參閱

資政院議員

李華炳
武鄉

參閱

衆議院議員

李慶芳

參議院議員

苗雨潤

農商部技正

王縉雲

纂修

總統府顧問

王維新

襄垣縣志

修志姓氏

省議會議員

連篤敬

前縣議會副議長

孫安樂

前縣議會議員

郝映衡

省議會議員

趙懷璧

公欵局經理

趙允元

公欵局經理

郭永慶

分校

承政員

趙鴻春
直隸

承審員

翟繼唐
永濟

主計員

岑鍾麟
浙江

承政員

郭蓋頤
汾陽

承審員

劉建邦
五台

視學員

劉雲桂
隰縣

視學員

李程
夏縣

實業技士

張得志
襄陵

宣講員

採訪

韓瑩
芮城

第一區行政長

狄廷芝
趙城

第二區行政長

李通康
崞縣

第三區行政長

張孝慈
晉城

前縣議會議員

王培鑾

前縣議會議員

郝尙德

前縣議會議員

苗淳然

前縣議會議員

王傳薪

前公欸局經理

姜作賓

縣農會調查員

路煥紋

抵產局局長

李仕楨

國民學校教員

李樹藩

前縣議會議員

董守身

前縣議會議員

李其榮

襄垣縣志

修志姓氏

二

第三高小校校長

燕文華

第三高小校教員

趙宋之

商務會文牘

秦廷璧

前縣議會議長

郝廷弼

前縣議會議員

栗維藩

前教育會副會長

張錦緹

國民學校教員

栗濟寬

國民學校教員

韓多慧

前路工局幹事

連承湯

前縣農會會長

申廣宸

教育會書記

王作賓

前晉城二區行政長

宋國華

前民軍營連長

孫嘉治

前國民小學校教員

武晉烈

前國民小學校教員

栗懷德

繪圖

膳錄

前第二高小校長

教育會書記

公歛局司事

第一科書記

第二科書記

第三科書記

王之宋

王建國

李儒範

張玉璽

高儒珍

鄭濟文

苗向榮

襄垣縣志

修志姓氏

三

新頒志書凡例

晉城郭象升

方志之書肇於唐宋明代求備而不精清代尚雅而寡用專門方志之學莫過於章學誠欲隆其道於國史其說往往奢闊難施就如其說又乏執筆之人簿書筐箠之間非可與為雅言者也南皮張氏舉晚近志書之善者二十五種徒以作者出於名流固未察其利病雖資效法亦苦多歧夫方志之作主於博稽陳跡以前民用若夫源流清濁之所處風化芳臭氣澤之所及固可因而見也函雅故通古今陳義雖高抑猶其後焉者乎清季籌備立憲各省飭屬纂修風土志以為地方自治之引嚮會遭改革事不克舉然新志之議于此萌芽矣風土志意主興起實業作新明智與舊志體例齟齬舊志既不容輕廢則或廣續或重修宜增新條溝之使一舍其短而集其長夫亦因時制宜之道也不揣陋劣謹擬凡例如左

第一圖 計圖

方里圖 用新測繪法務須精審不得以舊志縣境全圖充數

山脈圖 詳具山名附山村莊之名擇列

河道圖 方里圖但具經流此圖兼及支水附水村莊之名擇列

城郭圖

襄垣縣志

凡例

第二略 計略十與書志同義鄭漁仲通志二十略是也非疏略之謂

疆域略 都里村坊四至八到

溝洫略 開渠引水之事故堰新防之所

賦稅略 倉儲附

丁役略 戶口驛站附

禮俗略 婚喪之儀既載駕風亦錄新制雖未遵行宜漸改革至於年節風俗自改用陽曆以來民間仍守舊實不載則失實載之則違時宜標明陰曆云云庶乎不觸不背臨文自行斟酌可也

生業略 土農工商各有偏重調查詳載務得其實

物產略 動物植物礦物

氏族略 舊志間有此門今仿而為之

方言略 分類列之如爾雅釋名之例

兵防略 巡警附

第三傳 計傳六

名宦傳 舊志有傳而名不副實者悉退之入官師表中

名賢傳 位尊而功德不稱者但具其仕履於選舉表中

文儒傳

理學文苑皆入此類研精書畫之士擇尤附見

孝義傳

此用華陽國志之名凡賢媛才女皆可立傳不必拘於節孝而無事實者總列於後

士女傳

舊志於人物之有疵累者一概不爲立傳殊屬失實宜按正史有傳之人一一編入卽大奸大佞亦不隱諱但於傳未注明出於何史

雜傳

計表

第四表

官師表

議員選舉表附後

選舉表

或改或創地點經費年月一一具列其蒙小學堂教職員姓名不載

學校表

計考

第五考

沿革考

城郭衙署橋梁之類

營建考

祠宇冢墓亭館之類

古蹟考

襄垣縣志

凡例

二

金石考

舊經名人題跋考證者照原文登入無題跋考證者但具撰人時代出土地方如寰宇訪碑錄之例

著述考

具列存亡如經義考之類

舊聞考

兵火災祥異事凡舊志所有而不可缺者入此

叢考

凡經史子集有一言片字關涉本邑者詳悉搜羅每條具載書名

舊志所有今廢而不用者如衙署八景等圖藝文祭祀等志流寓等傳封蔭等表分野等考是也藝文之有關係者可以散見諸志諸考之中或分行注或亞格寫或剪裁其辭以入正文神而明之存乎其人其流連風景之辭一併削去若出於前代名家難以割棄者能附入古蹟考者入古蹟考不能者入叢考流寓事跡亦入叢考

右凡例凡重修縣志者皆準之其無力重修但擬續者同於前志則不便異於前志則非續宜題曰新志仍準此凡例凡例所有而舊志亦有者則續之凡凡例所有而舊志無之者則立之於卷中注明右志書凡例乃民國七年所頒行者至八年以後有分區編村之制例應增入今於第一圖內增分區圖於第二略內增區村略而另訂目錄於後

重修襄垣縣志目錄

卷一

方里圖一

分區圖三

山脈圖一

河道圖一

城郭圖一

疆域略 袤廣

街坊

里鎮

鄉都

保市

山脈

河道

卷二

區村略 區制

村制

溝洫略

賦稅略 田賦

稅捐

積貯

租課

丁役略

禮俗略 鄉儀

節序

新制

襄垣縣志

目錄

生業略

物產略

氏族略

方言略

兵防略 巡警 武具

卷三

名宦傳

名賢傳

文儒傳

孝義傳

卷四

士女傳

烈女

烈婦

節婦

賢婦

雜傳

方技

仙釋

雜紀

卷五

官師表

選舉表

卷六

學校表 文廟 學署 學田 書院 勸學所 教育會 各學校

沿革考

城郭 縣署 局所 壇壝 橋梁 廟宇

營建考

卷七

城壘 寺觀 陵墓 義塚 記表

古蹟考

金石考

卷八

著述考


祥異 災賑 舊志序及例目

舊聞考

禮器 樂器 樂章 祝文 鄉飲 僑寓

叢考

襄垣縣圖例


| | | | | | | | | |
|---|---|--|---|---|---|---|---|---|
| ● | 古 | 二 | 井 | ● | ○ | ● | ● | □ |
| 牌 | 古 | 橋 | 井 | 煤 | 礦 | 主 | 鎮 | 縣 |
| | | | | 合 | | | | |
| 坊 | 頭 | 樓 | | 礦 | 村 | 村 | 市 | 城 |
|  |  |  |  |  |  | | | |
| 村 | 汽 | 道 | 城 | 區 | 縣 | | | |
| 界 | 車 | 路 | 垣 | 界 | 界 | | | |
| | 路 | | | | | | | |
|  |  |  |  |  |  | | | |
| 林 | 山 | 河 | 商 | 廟 | 公 | | | |
| 園 | 脈 | 流 | 民 | 宇 | 所 | | | |
| | | | 住 | | | | | |
| | | | 所 | | | | | |

襄垣縣志卷一

方里圖

方里圖者所以明立縣之大要也考襄邑始於趙襄子故名襄垣而所屬爲銅鞮舊壤又有虎祁之宮實山西一大都會也舊志首疆域而山川附焉未若斯圖之晰測繪一用新法凡東西南北開卷瞭然斯圖既合而全縣之綱領以具卽視爲燕韓之屏蔽河朔之襟喉夫豈異乎

襄垣縣方里圖




尺之一分万十二

中華民國十年


分區圖

分區者就全縣之境劃爲數區而分治之者也其制始於民國七年至今日而遞演遞進政令推行若網在綱顧氏謂小官多者其世治不信然歟襄垣全境計分三區今分繪三圖而以編制之主村附焉覽者可以得其梗概矣

圖區一第縣垣襄



襄垣縣第二區圖




襄垣縣第三區圖




山脈圖

山脈圖者所以記邑中之山也詩稱崧高維嶽峻極於天維嶽降神生甫及申言俊傑之生必由山靈之聚故磅礴鬱積往往復鍾於人則說山者亦騷人韻士之所必及不獨淮南鴻寶因以名篇也舊志山川皆統於疆域茲別爲圖以明其略而其詳列仍附於疆域

襄垣縣山脈圖



襄垣縣河道圖




河道圖

河道圖者其源出於水經好古之士所必詳焉襄垣之水最大者爲漳環城經流又有清濁之異其餘若涅水臨水史水甘水有源有流皆與襄邑爲襟帶若云水利涅臨諸小水無論矣漳水性猛喜刷襄地土質疏鬆河身低而岸高亦無水利之可言然雖久雨不能爲患是襄民之福也往昔疆臣多言西北水利如襄垣者井泉而外鮮所施焉卽間有兩河灘地數頃望之似可以開渠者但恐渠工鉅而灌溉少而漳水遇旱又涸亦非興利之道休戚之誼與民共之覽斯圖者可以知其故矣

城郭圖

城郭圖者舊志有而詳加測繪者也城爲趙襄子所築舊址在甘水之北唐武德初漳水徙侵復築韓州城於甘水南金天會間知縣韓俊增築水南外城即今城也自是之後屢有修補見於藝文紀述可覆按也

圖 廓 城 縣 桓 襄



疆域略

疆域略者因舊志而加釐訂者也舊有疆域一類兼及山川流峙不可缺也茲仍其例凡四至八到鄉里遠近邨坊名稱與改革後之區制村制與山川方位之詳官斯土者一覽是略即知疆域之所訖庶因俗布化修舉廢墜務求實惠之及氏而不限長沙地小不足以迴旋也此則專輯疆域略之深意後之人其致思焉

袤廣 及縣境四至

襄垣縣在舊潞安府今長治縣北少西九十里

東西廣一百二十五里南北袤九十里舊志廣一百一十里袤八十五里

東至黎城縣界鶯溝村五十里至黎城縣治九十里

西至沁州界溫泉村七十五里

少北至沁州沁源縣治一百六十里

南至潞城縣界石窟村二十五里

北至沁州武鄉縣界高嶺村六十五里少西至武鄉縣治九十里至遼州榆社縣治一百五十里

東南至潞城縣河拜店三十里至潞城縣治六十里

襄垣縣志

卷之一 疆域略

西南至屯留縣界交川舖五十里至屯留縣治六十里

東北至武鄉縣界北漳村五十三里至遼州治一百六十里

西北至沁州界新店村小王舖八十三里至沁州治一百二十里

西北由虜亭鎮達省治四百五十里

東北由黎城達京師一千三百里

通志云襄垣內平坦外高峻後漢書亦云邑帶山林茂松生焉洵不誣也况五陽聳於離方五音峙於坎位龍洞雄於震地紫巖麗於兌域濁漳呈浩淼之觀甘水鼓清漣之浪人文秀傑之氣知所自來而山河如故光景常新余因願襄邑之風土趨而日上也本舊志

按襄垣之脉發源於沁州伏牛山轉折百有餘里至本邑高廟嶺抵桃林山由西門外庚方落坪邑之城池在焉其地背負韓山面峙鹿臺漳水抱左有灣月之形甘水遠右如金鉤之壯昔稱金鉤釣月居然一偉觀也萬歷間有駕水勢侵城之說因鑿東北岡令漳水直流而人文漸衰適劉公武公相繼引渠築堤於是邑人王基洪有重挽漳流之記未幾堤壞水復直去崇正間知縣王懌欲修未果清初知縣鄭僑與士民議復亦艱於修築而止今乾隆三十年後北門外漳水遠西漸復古道而邑里頗繁庶人文復興此氣運轉移之一會也

街坊

立政街在北門內

崇文街在南門內

立義街在東門內

立教街在西門內

新民街在南關

明德街在縣前

育賢街在學前

東廂街在北關東

西廂街在北關西

崇仁街在龍洞廟前

西成街在西關

聚奎坊為劉龍建在縣治前

世科坊為郭綺建在縣治東南鐘樓街

進士坊為郝良臣建在北門內立政街

早掇天香坊為劉承裕建在縣治東南鐘樓街

清朝柱史坊為劉潔建在縣治東南鐘樓街

少方伯坊為姚九功建在縣治東南鐘樓街

亞魁坊為韓做建在縣治西門內

經元坊為王宗舜建在北關東

達尊坊為劉龍建廢

亞魁坊為劉夔建廢

進士坊為劉夔建廢

優卹坊為劉龍建廢

經魁坊為王宗舜建廢

禹門鯤化坊為張勇建廢

襄垣縣志

卷之一 疆域略

奎畫褒揚坊為郝琛建廢

太史坊為劉龍建廢

宮允坊為劉龍建廢

風憲坊為姚九功建廢

龍光坊為李彄建廢

冢宰坊為劉龍建廢

學士坊為劉龍建廢

繡衣坊為劉潔建廢

世躍龍門坊為劉鳳鳴建廢

大司馬坊為劉龍建廢以上俱在縣治東街

亞元坊為劉承恩建廢

司諫坊為劉夔建廢

參贊藩機坊為劉夔建廢以上俱在縣治東南鐘樓街

武選坊為賈天爵建廢以上俱在縣治西街

冏卿坊為郝良臣建廢

文選坊為郝良臣建廢

大光祿坊為郝良臣建廢

明允坊為劉承恩建廢以上俱在縣治前街

天官大夫坊為郝良臣建廢

探花坊為劉龍建廢

亞元坊為劉龍建廢

大宗伯坊為劉龍建廢

執法西曹坊為劉鳳儀建廢

都憲坊為劉夔建廢

進士坊為姚九功建廢

秋官大夫坊為姚九功建廢

進士坊為賈天爵建廢

宣化坊在縣治西廢

平易坊在縣治東廢

激揚坊在舊察院前

城隍廟坊在廟左

承宣坊在立教街廢

育賢二坊在儒學左右

備文坊在南關教場前廢

縣治既設闡闡用興襄雖僻壤而人民輻輳締造為難縱無高甍巨棟街市里閭亦頗整飭可觀矣至坊
珉之設所以旌賢紀勳昔賢流風未泯儻有砥行立名之士接踵而起後先輝映是所望於有志者

里鎮

都鄙鄉里縣不一制而按里定賦雖徵之天下不易也明洪武初襄垣原編四鄉七都九十里宣德併七
十里成化間知縣王溫增明德新民二都編八十三里宏治併六十九里隆慶間併六十三里清順治元
年仍四鄉九都併二十八里乾隆三十六年知縣賈慎行又增西成坊為十坊都焉

四鄉

永豐鄉在縣東南

平善鄉在縣西南

長樂鄉在縣東北

甘泉鄉在縣西北

十坊都

東廂坊

立政坊

崇文坊

崇仁坊

明德坊

立教坊

立義坊

西廂坊

新民坊

西成坊

襄垣縣志

卷之一 疆域略

二上八里

東廂里

邯鄲里

豐曲里

立政里

故縣里

新民里

下表里

崇文里

上王里

原庄里

崇仁里

南娥里

東周里

閻村里

明德里

上豐里

夏店里

陽澤里

立教里

鹿亭里

太平里

立義里

桃林里

西川里

傅村里

西廂里

趙庄里

赤壁里

八十保

衙前保

東門保

南門保

西門保

北關保

南返頭

八里庄

羊羔嶺

東嶺保

原庄保

倉上保

上王保

安德保

張家庄

涼樓保

甘村保

常隆保

閻村保

邕子保

任家嶺

元塢保

太平保

王家庄

下峪保

西河底

桃樹保

北馬喊

田漳保

塢頭保

上豐保

善福保

北娥保

閻老凹

南娥保

堡底保

鹿亭保

小河保

太平保

固村保

西底保

池子保

郝家坡

南坪保

魏家坡

峪口保

祝家嶺

夏店保

霍村保

九龍保

西河口

南底保

王壁保

圪塔頭

九庄保

傅壁保

王家溝

榆林保

五嶺保

下良保

橋烟保

北郝村

故縣保

水碾保

邯鄲保

強計保

段堡保

上良保

秋根底

西營保

南漳保

北南坪

史北保

青家庄

王村保

送返保

迴轅保

南窰保

七里脚

坪村保

龍王堂

市鎮

縣市

逢單日市

虎亭鎮

在縣西六十里古銅鞮縣今為虎亭驛逢單日市

夏店鎮

在縣西三十里逢雙日市

下良鎮

在縣北三十里北通遼州一四六八日市

西營鎮

在縣北四十五里與武鄉界接二五十七日市

長隆鎮

在縣西南二十五里南通潞安府北通沁州單日市

東周鎮

在縣西南二十里市廢

榆林鎮

在縣西南八十里五嶺關之北市廢

史北鎮

在縣西北四十五里與沁州接界逢雙日市

原庄鎮

在縣東南三十里

五嶺關

在縣西南七十里按山西通志五嶺山為南北咽喉明正統元年設巡檢司後裁

襄垣縣志

卷之一 疆域略

四

井谷關

在縣東三十里按山西通志谷內深如井故名魏初置關周建德六年廢金河東名將恒山公式恐遇害殞於此

故關

在縣東二十里按唐書襄垣縣有津谷故關

山脈

仙堂山縣東北五十里山勢崇隆林木茂盛山麓有寺殿內泉水湧出環繞左右西有巖巖中有洞列觀

音羅漢像有人面石取月梯醉雪石舊傳有修真之士隱居於此後仙去即八景中仙堂舊隱

有武邑趙三麒麟仙堂山記一篇云太行自雲中發宗先天之良後天之乾也洛書之文陽止陰上

伊止之所為行之庭志謂中原之正脈兩腋如華蓋仙堂在太行之中右腋靈山之一是山何有有

紀有堂羣聖巖巖鶴鹿仙仙欲舞李進士濬詩此是蓬萊真境界更於何處覓仙堂山屬西路韓州

略武邑百里而遙癸酉桂月望一日石梁子出吊東堡李生一人憇憇仙堂之遊獻香餼糧無聲而

辦十二日辰發過崇法寺寺松塵尾四垂頂橫枯槎名天橋松亦數百年嘉樹也馳十里至大石坡

不可乘着履行五里歷棗凹四竈無烟虎豹交於溪壑鳥雀相呼亦少又五里抵坪上始聞磬音荷

鋤而至者史光典也云仙堂寺原坪上古刹一夜風雨大作起視林石偃伏佛殿寶幢已神運於彼

山矣本村寺址賦冊尚載第林密路歧人畏為俛非諳歷者不能前即拉光典為導越南橫山茅塞

無路聞樵丁丁呼之不出復西折斜貝嶺十五里牽藤而上力盡憩於松根猷石火午炊肴出杖底

雉飛炊下應手而得欣然一飽行一里循上虹嶺瞰襄垣城樓與仙堂遙對殆縣之良背也導曰東

有甘花南有賢亭兩山重嵐隱豹僅管窺耳上上下下再尋登峯路數盤至巔巔如上帝之碧爐登望仙岡俯視仙刹若在大麓深處既陟復降懸崖千仞五丁半天開徑俗謂捨身巖衆有戒心不欲進導曰天下之奇險天下之奇觀也惟危得仙又何畫爲乃踞踏擦耳行約二里許棧腐中斷進退不得恨不立化猿鶴結衆衣帶縋而下不啻鄧艾裹毡陰平也十八轉始得石葉稍平出險相慶取酒脯祭餉甘苦亦略相當高視刹在山趾及抵寺門刹尚在肩回望捨身巖雲隱在有無閒遊仙夢眞從天而降矣寺額靈鷲奇峯四大字入門上香已以瞻以儀僧曰三佛一鐵一石一木謂泥佛不度水也佛座前各面一泉殿外二泉故又名五泉寺云四匝石純青如九疊雲屏中爲獨秀峯亦曰翠微接天井山可望不可及絕壁潮音洞外砌重臺卽勝國李給諫西野壁召地壁間墨林止辨五峯積雪春光暮萬壑凝冰夏日寒二語餘篇磨滅僧曰當年西野盡節墨跡毀於僮父此詩危也歎歎久之天將暝止宿僧舍十三向琉璃洞洞口長石猶龍鱗角生動上下四壁作玻璃色一石佛水出於臍禱病禱雨輒應尙惜沮洳閉塞日月之光不射雲霞之彩不生余意略加疏濬合五泉而作瀑布當更有靈焉西羅漢石亦名鑄鈹洞僧云時聞雲嗽仙樂豈知巖竅空瓊風生則鳴則高下成韻無足異遂過硃砂洞傳有樵者鍊大還仙去劉文安公紫巖有仙堂樵隱詩爲縣八景之一折西數武爲講經壇有人面石當壑儼點頭狀山門外有蹬署取月梯本一片石人鑿而蹬旁譽新題醉雪石標狂士李某偕女史雪梅朝山進香爲十日飲酒雲彈月不知李迪雪中高臥林下美來詠梅

襄

垣縣志

卷之一 疆域略

五

耶詠人耶斯語可傲東山謝相可當靈巖響屨曾幾何時青衿山黛胥化白楊秋草其情景更爲何如北巖構庭者碧霞宮也草有毒蛇故佛前班荆命酌天放夕陽聞樵牧唱響應林壑徐而察之有風聲禽聲鐘聲虎嘯猿啼聲山精野怪聲始而欣旣而怖拔劍而起何必戀苦酒三升哉就枕不能寐月衡月準堂堂山額作水晶窻披衣復坐招同伴集山堂曰今春秋也遊仙賞月百年一日必飲盡提來旨酒看盡夜光山色倩雛僧吹坐敲柏歌而和之衆客旣醉余亦和衣而寢不知日上三竿矣十四日束裝言歸披榛得喬太保宇修寺斷碑白巖先生人中之鳳茲邱何幸得斯文也命扶而豎之南入石弄澗橫怪碣足容數人罅吐琪樹如蓋余題曰差可坐隱穿百樾中至下墻基又五里抵漳河大峽卽高齊隔岸拜爾朱兆處颺母封姨與漳龍作昆陽終日之戰不得渡仍迴津處蕭家沱劉文安公塋在焉丹墻數仞石門包鐵御製豐碑夾松柏如稠林之笋賜祭田東八頃西八頃蒸嘗比於玉豆見勝國優禮重臣小邑一大觀也展拜祠下留詩碑陰乃沿南迪地而邯鄲遙望後趙張景公墓客讀公邠詩凜凜有生氣予次韻口占三首細雨忽來北渡節貝跋躡斗底坡至壁休焉無石可語念是莊韓生元復作古東山寂寞無人矣是夜夢倚寶閣一叟授五雲詩箋止記有八

七花前十二樓之句罇子燈下續足得詩十三首茲錄其起首三首

八七花前十二樓香飛蝶夢與天遊神人久假無消息獨倚雕欄最上頭

八七花前十二樓水晶簾箔月爲鈎呼童掃石排沆瀣我與山翁話海鷗

八七花前十二樓仙郎欲動故山秋閒來眼豁腸皆換拾得紅霞作釣裘
又有仙堂嶺望五言詩一首

烟巒韓地盡坐嶺漫扶筇危蹬驕山鬼輕沙印虎踪府觀天井宿縣對寺門松探得琅玕露能銷戲
舉烽

五陽山縣南十五里五峯高聳日出光照故名之

五音山縣北二十里一名神頭山地形志襄垣有五音山神祠一統志周公至此陰霧五日故名又傳魏
孝文至此陰暗五日祭之天遂開朗上有孝文廟

龍洞山縣東北七十里洞深百里許入遼州境相傳昭澤王修真於此因號龍洞禱雨輒應

韓王山縣北十五里高峯挺秀孤松子立森然可仰上有韓王廟卽八景中韓山獨秀

趙王山縣東北四十里相傳趙襄子寓此上有趙王廟又謂石勒屯兵處

獅山縣西四十里九龍村東又名九龍山峯頭大石儼若獅形夕陽返照有動蕩之狀卽八景中獅山晚
照

百穀山縣東南二十里其山百草叢生世傳神農氏嘗百草於此

五嶺山縣西南七十里五峯環立爲南北往來之衝明正統間設巡檢司今裁

紫巖山一名寶峯縣西五十五里其山色紫雪霽暉映景尤清明有麻衣洞深一里內有泉出禱雨輒應

襄垣縣志

卷之一 疆域略

六

卽八景中寶峯晴雪附註秦和歐陽雲所題紫巖山歌

混元崛起雄三晉上干女虛纏彩應靈氣蜿蜒宿冀寧盤踞煥彩擅形勝南自澤來跨潞東轉北折
西美無盡苒葱霞絢映六府銅鞮宮號虎亭鎮兌宮主管白藏神坤維演出龍蛇陣旣如拱揖欲將
迎又若端詳求定靜風藏水聚氣凝結縮綺嵌繡精神發山容至此頓殊姿非赭非頰惟紫色初疑
紫蓋覆龍從又疑紫鷲翀旁魄石疑運自紫河車泉疑紫衣僧卓錫香爐日照生紫烟紫闔排開襯
紫綿沁水自西漳水南合流襟帶紫巖岼太元東畔羣峯轟奔虹駐駟互倚伏躩踞踈虎默咆哮蚺
膠潜虬謝蹀躞祥霄吞吐玉繩低瑞靄去來銅關簇茁非蕪亂乃寶連產不離奇還若木銜印端能
廬葵蠹捲旂猶可招猿鹿捫天倚日圍玉界點秀飄華封靉黹九曲河流漢神珠天吳吉良交澎湃
耳奏謬泠徹三高眸增浩蕩恢恢大表裏山河百二強俯視須彌容一芥草號逍遙舖碧落樹自丹
青遙相若黑陽鬱燠避窳籛丹邱杳眇迷垠堦紫瑄山輪鐵鯉遊紫恒山泛金鳧躍紫花魏圃慚織
葱珍果陳家紫下風紫毯堆自閭崑岑櫛櫛不說紫髯翁大彭小彭讓積瑤肯使小雄大雄嶠巋然
標準軋山石紫珥富媪貫招搖我聞山色紫獨珍黝然艷爾難其倫不然象緯在天獨尊紫薇垣洪
鬯落地見寶紫石英溟淖滌盡舞山香朝霏夕薤護秘藏懸知大塊寓深屬金膏玉檢那能當紫虛
降勅地仙駐半千運數眞殊遇毓成雋壘白巖中紫氣胸中聚赤鱗脚玉築堦垣元鳥馱材造拱柱
忠孝兩字承標纓蚤是靈椿紫囊畧生公豈是碣礪坯目如紫電輝琪樹韶齡不帶紫羅囊紫案青

編森武庫筆端飛出紫金蛇紫府苔堯個旒旒上苑花探紅間紫翔麟獨跨紫陌裏紫界官墻切大蓬取青紫如拾芥爾香浮紫褥講金華紫毫銚傍紫薇花紫宸日麗西昆局紫泥封降渥恩加祗今酌斗冠南都紫金山下建高牙竚登紫閣赭袍衣滿朝朱紫艷籠紗軒然奪盡紫巖春巖春豈直公一身紫荆樓前薦花萼紫芝階下粲寧馨填門佳絕付雕鐫蟬聯彷彿巖連蹠詞華藻綴巖競秀望俄日磊巖具瞻人道地靈足材用我道人堪致地重康瓠詎堪盛豹胎流沙端合出龍種君不見亭紫薇閭中魁宿參井齊又不見山紫陽元晦道學日爭光峭無古今無南北此理奚須訊蒼黃紫袋瓊琴贈宰弼染指巖彩無雙翼商顏不歌懼懼紫神往并汾賁蒐繹爲公翻作紫巖詞吹向紫鸞簫嘹唳嘹唳引至萼綠華逸興遄飛便欲逝紫極

又忻州張星祥登紫巖寶峯有詩云倚紫巖之寶峯插清冥而上浮披榛扳石蹬直上寶峯峯上遊仙嶠凌空懸日月峻嶺崇崗莫與儔俯視漳江如一帶迴環盤踞古韓州寒光映奎壁紫氣貫斗牛壯志超生有覺殿曠懷高寄無梁樓忽遇緇流有異客心通墳典探邱索相邀同坐復烹茶看破塵緣爲余白人生天地等蜉蝣石火電光相逼切世事紛紛日夜忙機謀盡是前生厄金氣西行大火流松風羅月冷颼颼雁落青霄排行陣蟬鳴黃葉響箜篌說罷山頭發浩歌手敲木盂口吟哦搖頭杖策回禪院態度儼然似達摩我聞僧說法消我古今憂憑虛登空叫已矣復何求賣珠主第成新貴種瓜青門本故侯爲郎顏駟終難遇罷相香山得自由仲連避世歸東海君平賣卜隱梁州角里

襄

垣 縣 志

卷之一 疆域略

七

商山食芝草子陵灘頭持釣鈎歲月無今亦無古何知三春與九秋但得依荷躡躡從爾往日日共坐寶峯之峯頭

又高密單可堪雨後望紫巖山有詩云雨霽憩郵亭山川殊清曠開軒對紫巖新洗芙蓉嶂斷雲鳥邊飛懸瀑松際漲風迴燦日華丹壁絢錦帳崇閣帶平林漳渡濤聲壯遙聞清磬音不見麻衣相雪晴言更佳即此神已暢前日龍山遊虬龍盤萬狀何似寶峯幽後來居其上上黨古奧區欽崎工天匠還期曳青筇攀藤探佛藏

又劉龍遊寶峯寺有詩云

携酒尋芳入翠微醉中乘興却忘歸山川有約專相待歲月無情欲似飛村市遠張楊柳幕紫門斜掛薜蘿衣江湖廊廟平生事憂樂關心總不違

其 二

寺下清溪碧玉流寺前高閣紫烟浮鶯聲似逐韶光老花事閒生客子愁上黨地靈雄宇宙虜祁宮古屬春秋遙看蘭若斜陽外不惜捫蘿到上頭

其 三

幾年遊徧江南寺北望江山憶寶峯千仞紫巖金艷艷一溪漳水玉溶溶登臨陡覺風雲集唱和多勞故黨從投老忘機隨去住得於雲境寄塵蹤

其 四

紫石爲巖竇作基凌霄千仞重華夷地當衝要山偏好寺占清幽水自奇訪勝欲追滕閣記留題疑是輞川詩不應地主歸來晚惱得春風拂鬢絲

其 五

一春長苦雨霏微雨霽尋春春欲歸葉底幾聲山鳥弄風前無數野花飛鶻傳流水頻移榻杖倚高岡獨振衣林下無人真謾語閒情久與世相違

其 六

塵纓暫解濯漳流竇剎樓臺上下浮玉勒同遊真可樂金樽常滿復何愁沙汀睡鴨將臨夏麥隴藏鴉定有秋四十年來重到此傍人盈笑雪盈頭

其 七

竇峯寺在紫巖頂知是蓬萊第一峯殿古柏蒼風瑟瑟庭空花影月溶溶韶華付與閒生管樂事應教造物供欲向江南問消息幾人遊賞繼吾踪

邑人李洛步劉公原韻賦竇峯寺詩三首云

石蹬層層岨作基烟霞百道繞辛夷峯頭舊寺晴偏好閣下清流雨更奇樹點重巖成古畫鶯啼竇剎咏新詩恨予緣薄登臨晚短步前賢理故絲

山光水色漾斜暉莫怪遊人戴月歸紫氣遙連函谷合朱雲近接潞宮飛一峯珍重疑懷玉千仞憑臨欲振衣何事樓觀滄海日得於精舍暫依違

紫巖高聳夾漳流川媚山輝上下浮寺湧波心隨動靜村連水面閱春秋野花歷落含風細古柏蒼茫帶雨稠踏遍山腰雲片片不登極頂不同頭

又邑人崔育榮游紫巖山竇峯寺詩云

古剎清幽步步深蒼松夾道影蕭森幽人說法蓮生舌野客參宮佛卽心怪石流泉環淨域香風花雨集禪林坐來領略閒中趣不受塵埃半點侵

黃巖山縣東三十五里山石色黃巖下有泉禱雨多應麓有龍王廟

桃林山縣西十里舊多桃叢茂成林上有香巖寺寺後有塔高九層元季風折其半寺前有閣乾隆七年邑紳以此地本邑發脉之祖建塑文昌像白衣像每年士民欽崇烟火弗絕閣前有池池水從中湧出其年卽發科

小虎山縣西北三十里回轅店東南隅山形如臥虎故名上有昭澤王廟廟內清泉可愛秋冬之交楓葉滿山尤爲勝景

邑人崔育榮五月五日遊小虎邱有詩云

景物邀人不自由暫將身向畫中遊煙光籠岫晴疑雨涼氣侵衣夏似秋艾虎斜披添野趣蒲觴滿

泛發清謳晚來一送憑高目望盡茫茫天際頭

松石林山縣西北三十里庄裏村峯高松茂下湧清泉甘潔可愛有渤海龍王廟

南峯縣南一十二里峯上有寺寺後有樓傳爲元察罕那延太師河南王避暑處今樓廢址存卽八景中涼樓勝觀

鹿臺山縣南二十里上有文王廟又迤南小山上有周公廟五朝志襄垣有鹿臺山遙望漳水南來與鞮水西合曲折潏洄纏繞如帶劉龍詩沃壤似坪山下展人家如畫水邊居

又邑人劉夔詩云鹿臺嵒嶂高如許未及山腰日亭午王橋河水秋不深山下人家俗猶古草屋無人不開門野場積穀如環堵羣鷄得食喧爭鳴孤鶴穿林飛且舞登臺入廟心反傷鬼像神軀意何覩朱門金扉漸草萊秘帳靈衣盡塵土側聞我王曾治岐此地胡爲建神宇無乃戡黎駐羽旄至今血食陳尊俎聖母同堂饗未安尙父雖尊安伍庸庸鄙見何足嗤伏臘壺漿竟誰主蕭蕭風木同悲號慘慘雲山互吞吐十年懷渴今始來得共賢侯登廟廡賢侯奇倔中州英萬斛才華腹中取况復民歌德政成蕩蕩春風沛甘雨莫訝牛刀戲割鷄武城言偃曾知魯歸來明月仰在天靜聽南樓時二鼓

錯上洪山縣北三十三里山峯叢集故名

九仙峯縣東北三十五里水碾村東世傳雲映峯巒若有九仙立其上今有碧霞廟

襄垣縣志

卷之一 疆域略

九

筆頭峯九仙峯西形似筆頭所產之菜名筆頭菜

強記峯縣東北四十里臨水經其下

琉璃巖縣東北五十里仙堂山之西五色秀麗宛若琉璃下有石盤踞如龍狀

二仙港縣北十里有二仙女廟廟前池水清潔嘗四月冰猶未化每三月十八日神會遠近咸集

觀音洞縣東北五十里仙堂西北其洞深邃數丈內有觀音像芳草環繞夏月人至滿地花香

邑人孔毓麟詩云杳杳菩提何處尋仙堂山畔有觀音一溪漳水如南海幾樹蒼松賸竹林古洞幽深懸石榻靈巖寂寞聽鳴禽焚香莫愧塵汗久淨水長流可洗心

仙人洞縣北五十里按玉海唐元宗別駕潞州時其地忽開十數里因名仙人洞

硃砂洞仙堂山內舊傳有人煉丹砂於此後仙去

河道

西漳水一出沁州滑山一出沁州伏牛山二源異出合流東至洞村入襄境又南流至小河村納小河水並郝水過虜亭鎮會銅鞮水並郭水過夏店鎮東南流至傅村納下峪水至李村納雍子水至城南甘村與濁漳合

濁漳水源出長子縣發鳩山東入長治界折而北過屯留潞城界入襄垣縣南十五里遶鹿臺山北與西漳合至縣治東北隅納甘水遶城潏洄數折東入黎城界卽八景中漳江春渡

舊志載唐元宗別駕時巡縣至襄垣渡漳河有赤鯉騰躍于是潘炎作漳河躍鯉賦其賦云魚在在藻兮躍於中流吾君戾止兮樂我王遊惟赤鯉之呈祥瑞白鱗之入舟非竹箭之危湍無聞點額同君明之望幸非爲吞鈎豈其爲祥必河之鯉用表皇族克繁帝祉雖云水物宜紫鬣綠鰲之同身是曰元符亦赤雁丹鳥之可比頽鱗耀彩碧水無波非應瓠巴之清角何言甯戚之高歌周公之時躍於沼漢宣之代舞於河且合符於圖牒宜入頌於猗那豈徒鏤甲葺鱗下沿上泝皆爲儔正文鯉是喻吐尚父之兵鈐傳遠人之尺素匪琴高之所乘似相如之獻賦

邑人姚敬漳江春渡賦以思樂泮水薄采其芹爲韻其賦云青楊布令勾芒御曦春光明媚物采新奇布韶景之鮮妍自融碧沼激清流之澹蕩正值芳時旣仰韓山以寓目復臨漳水而興思潮其源也一出於伏牛之山一湧於發鳩之壑兩派合涼千尋繞郭寶峯下映翻疊嶂以深洄甘水斜分蹠晴波而綽約風吹河畔芳草青青雨灑渡頭天桃灼灼足披狂士之襟堪暢知者之樂况乎綠野新耕素水始泮日浮碧岸遙連獅嶺雄威烟瑣紅堤近浥涼樓勝觀盼河楊之蔚茂無殊衛竹猗猗瞻岸芷之芬芳何異鄭蘭渙渙彼厲揭兮就淺深欲溯洄兮偕同冠爾乃招同人臨江水風聲共鶴唳以偕來川色對花容而並美蘭漿競渡無非拾翠佳人桂棹橫江盡是遊春公子伊可懷也景物悠然靜言思之情形乃爾無何輕雲乍收殘陽已薄迴塘水際遊魚躍出婆娑弱柳枝頭飛鳥歸來棲落乘夜月以遨遊隨波流而泛艘快把酒以臨風發歎歌而交作嗚乎韓地依然漳江不改虜祁沒

襄

垣縣志

卷之一 疆域略

十

於青蕪銅鞮遷於滄海市橋之義士莫追仙堂之高隱安在能不令我心悠悠切兼葭之采采也哉乃爲之歌曰漳水兮漣漪當春渡兮雨淒其渺渺兮予懷望美人兮天之涯又歌曰襟帶韓州秀色氛臨流猶憶舊時聞弄珠遺佩人何在持贈殷殷獻一芹

邑人王基洪重挽漳流記

漳河之水發源沁州之北合鳩山之水而入襄邑即夏書所稱衡漳云其水勢自西北而南繇南而東又繇東而北復轉而西瀦洄百折始就東流蓋環邑如帶居然一偉觀也夫源於西則委於東建瓴就下水性固然迺周環邑境若睠焉不忍舍者堪輿家所稱源水有情斯亦奇矣以故鄉先達孕鍾靈秀文章功業爛然竹帛考之邑乘可知也邑固稱地瘠賦繁而萬石家時或有之水何負於邑哉今上御極之五年有濱河居者慮侵塌之患復冀沃灘之利用是駕爲水勢浸城之說鑿東北崗令水涇從此而東不復向之迴環矣嗣後科第寥寥十室九空甚至汲泉無水邑人且疑而莫燭其故時萬歷丙申關中天虞劉公來守上黨登襄城而望曰美哉山河之秀在此一折奈何泄之使去也捐俸三百餘金嚴勅當事者劈畫鞅掌開渠爲引築堤爲障三月而水復故道不佞已數困公車劉公覩成事則輒喜謂不佞日辛丑聯璧此其兆乎已而霖宇王君果聯第而不佞幸增驥程蓋不翅左券矣邑士民忻忻捧額謂氣運興衰之數適當河水去往之期即以達人之觀解衆庶之口誰其信之矧北城之隍西有小河旁溢於漳秋霖漲水泮泮頗惡漳水西環而流緩則此河入漳之勢

亦緩漳水經北而流急則此河入漳之勢亦急衝圮城此一堤也詎獨關一方風氣金湯所係良亦重矣辛丑之秋河伯不仁堤倏潰決向之所爲殫千金以日夜計者一旦付之流水惜哉邑侯武乘饑饉之後甫至襄即以民間疾苦爲事襄民幸免道殣目擊時事俯順人情幾欲砥柱狂瀾如民力弗瞻何乃亟請於郡丞童公童公蓋昔共天虞公覩成績者深悼其廢之速也卽躬履其址彈力以籌請於分守冀南項公議得儲穀千石賑金五百此請給於公者也項公則給續穀六十童公捐俸金三百邑侯武可則捐俸金七十士大夫輸金三十共費一千五百有奇其河渠長二百二十五丈廣五尺深半之堤長四十丈廣六尺有奇堤帮石基上築以土高三丈其受役之夫半係召募半係饑民蓋以工兼賑澤至渥矣工始於是年春二月訖於是年夏四月豈不亦遄速哉邑侯樂成事而請於余謂宜有言以誌不朽余方濫竽秘選深愧無文顧惟司馬氏之誌河渠也極言水之爲利害甚鉅而成功甚不易則有嘆於今日曰興利除害當事者之責也然議工於再廢則人情易厭勞民動衆長者之所忌也矧議工於險歲則怨詬易生之役也財發之公帑夫起於召募旣無勸勤之心復多衆善之集蓋一舉而五美具焉風氣渙而復萃人文闕而復彰前之殫千金而若逝者悉還故址一美也城之與堤實相表裏堤固則城堅城堅則邑固二美也屢歲不登枵腹嗷嗷茲日役千人則千人得餉且得餉之餘以餉其家以役寓賑功其細哉三美也且河工剩費悉置義倉令二青衿之長年者掌其事永爲緝堤防患計使後無勞意深遠矣四美也守土者難於興事亦不旋踵而

告成功令後人有所歆慕不憚繕役爲邑覆庇五美也五美之具僅僅屬以一堤一堤之外何可更僕數余不佞爲邑士民稱幸而重以諸父老之請漫爲記其顛末如此

邑人賈待旌辨濁漳詩一首云窮源四十里靈竅瀉芳泉眉睫池中見蒸嘗石上鑄濯纓發清興逃世隱塵軫寄語循名者濁漳空浪傳

涅水亦名小漳水縣西北六十里源出沁州覆甌山東流至吳壁村入襄垣境過南漳村會臨水過水碾村東會史水至段堡村東南與漳水合

臨水亦名小漳水縣東北三十五里源出榆社八賦嶺過武鄉縣南流至南漳村入襄垣境與涅水合史水縣西北六十里三史村東流至水碾村入臨水

甘羅水縣西北三十五里甘泉湧出水聲冷冷噴珠漱玉東流過縣城東北入漳水卽八景中甘泉漱

玉
東北陽村
有甘羅廟

雍子水縣西南四十四里郝家山東北流過雍子村至東李村之北入西漳

下峪水縣西一十五里下峪村南流過付村之東北入西漳

銅鞮水按水經注出銅鞮縣西北石磴山東流與專池水葦池水合流入西漳

專池水按水經注出入特山東北與銅鞮水合入西漳

葦池水女諫水之北卽葦池

女諫水銅鞮水之東南即女諫

榆交水在葦池水之南以上五水俱出通志

小河水縣西北七十里祝家嶺西南流過小河村南入西漳

郝水縣西北七十七里郝家坡西南流過鹿亭鎮北至窰上村之南入西漳

郭水亦名趙村河源出沁州西南東流過屯留縣三教村至高巖底入襄垣境東北流至鹿亭鎮南趙村

之北入西漳

明渠水縣東南十里渠東村之西北其水清潔可愛過東壬橋村西流入漳水以上四水舊志失載

井泉

義井 在縣東南郭庄村獨此一井村人相讓而飲

琉璃井 在鹿亭鎮舊傳有琉璃砌成八角井即崔生墜虎皮處

鹿哭泉 在縣東南五里昔有人生子左臂一目怪而棄之鹿乳焉後遇人收其子鹿尋不見墜淚成泉其子即三日僧也

白水泉 在縣東北三十里水從石崖出其味甘美

暖泉 在縣西五十里大平鋪西水溫可浴

石泉 在縣西四十里獅山鋪西水出石中清冽甘美

襄垣縣志

卷之一 疆域略

十二

黃巖泉 在黃巖山石洞中泉水清冽左右居民食之

合倉泉 在縣西四十五里太平村逢冬至日即水之流止以驗歲之豐歉多應

溫泉 在縣北六十五里楊家庄村之西數眼涓涓冬月不冰泉之陰有崔氏祖塋一座古柏一株蘋草繁茂魚鴨游泳

